

266.

Lettre du magistrat d'Ypres au prince d'Orange.

Il prie le prince de nommer capitaine Pierre de Griboval.

30 août 1578.

Monseigneur

Après longue expérience avons cognu la bonne fidélité, diligence et vaillance du S^r Pierre de Greboval au faict de guerre, auquel comme l'avons employé passé plusieurs années, nous ayant encoires dernièrement faict démonstration de sa vaillandise à la surprinse de ceste ville (1) se jectant sur le marché avecq son enseigne, prest à combattre ceulx quy la surprindroient (lesquelz l'on estimoit estre François comme ilz se moustroient desguisez) là où ledict enseigne luy fut par force osté; et que ledict Greboval nous ait déclaré vouloir continuer encoires son service pour la patrie et Estatz et y employer corps et biens, jusques à la dernière goutte de son sang, avons bien voulu en consyderation que dessus, faire cestes à Vostre Ex^{co}, la suppliant par icelles, avoir ledict Greboval pour recommandé au faict et charge de capitaine, comme l'ayant (soubz correction) par longue expérience bien mérité et soubz ferme confidence que Vostre Ex^{co} y aura le regard quy convient. Ne nous eslargirons dadvantaige, ains la finirons avecq prières à Dieu de conserver,

Monseigneur, Vostre Ex^{co} en sa protection, nous recommandans très humblement à la bonne grâce d'icelle. d'Ypre ce xxx^o daougst 1578.

De Vostre Ex^{co}

Tres humbles et tres affectionnez serviteurs,
les advoé eschevins et conseil de ladicte ville.

A Monseigneur Mous^r le prince d'Oranges.

Y. Portefouille A 14. Minute.

(1) Voir document 203, t. I, p. 535.